

**Atuarfik pillugu inatsisip atuuttup allangortinneqarnissaanut, taamalu meeqqat atuarfianni tamani isumaginninnermut siunnersortimik imaluunniit inummik isumalluutigineqarsinnaasumik minnerpaamik ataatsimik atorfinitsisoqartarlernissaa anguniarlugu siunnersuusiornissaamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Meeqqat pisariaqartitsisut atuarfimmuut tunngassuteqanngitsunik ajornartorsiutigisinnaasaminnik oqaasinngortitsinissamut, ikiorneqarnissamullu periarfissinneqarnissaat atorfinitsitsinerup qulakkiissavaa.**

(Inatsisartuni ilaasortaq Nivi Olsen, Demokraatit)

### **Akissuteqaat**

(Ilinniartitaanermut, Kultureqarnermut Ilageeqarnermullu Naalakkersuisoq)

### **Siullermeerneqarnera**

Naalakkersuisut Inatsisartuni ilaasortaq Nivi Olsen, Demokraatineersoq, aalajangiussassatut siunnersuutaanut qujassuteqarfigaat.

Naalakkersuisut siunnersuuteqartoq isumaqatigaat oqarmat meeqqat atugarissaarnerat inuiaqatigiinni suliassat pingaarnerpaat ilagigaat. Toqqissisimasumik ingerlalluatumillu peroriartorneq siunissamik pitsaasumik tunngaviliisarpoq. Naalakkersuisut meeqqat ajornartorsiutiminnik aaqqiinissaminnut tamanik periarfissinneqarnissaannut aamma isumaqataapput. Kinaluunniit tamatumunnga isumaqataanngissinnaanngilaq.

Kommunit suliniutit assigiinngitsut annertuumik suliniutigereerpaat. Kommuninut apersuinerit takutippaat, illoqarfiit atuarfiini annerni amerlanerni isumaginninnermut siunnersortinik imaluunniit inummik ikiorsiisinnaasunik sulisoqareersoq.

Ajoraluartumik nunatsinni isumaginninnermut siunnersortinik ilinniarsimasunik amigaateqarpugut, tamannalu kommunit sulisunik pisariaqartitanik atorfinitsitsiniarnerminni ajornartorsiutigaa. Najugaqarfiit isorliunerusut ajornartorsiummik tamatuminnga eqqugaanerusarput.

*”Nalilersuilluni ineriartortitsillunilu suliamut: Ilinniartitaanerup aaqqissuussaanaera eqaatsoq ataqatigiittorlu”-mut tunngatillugu Naalakkersuisut tassani inassuteqaatinik, ukiuni 12-ini atuartuunissamik pisariaqartitsiffiunngitsuni, ingerlatitseqqiiniarnertik aalajangiuppaat. Tassani inassuteqaat una nassaassaavoq a) *Meeqqat atuarfiata pitsaassutsimigut qaffanneqarnissaa*. Tassanilu immikkoortoq 2-mi taaneqarpoq *“Suliniutit tapersersuutaasut pilersinneqarnerisigut atuartut ikorfartorneqarnerunissaat”*. Suliniut taama ittoq tassaasinnaavoq atuarfimmi isumaginninnermut siunnersorti imaluunniit inuk isumalluutigineqarsinnaasoq alla.*

Naalakkersuisut nalilersuilluni ineriartortitsillunilu suliniutip malitsigisaatut meeqqat atuarfiat pillugu inatsisip allanngortinneqarnissaanut inatsisiliassanik suliaqarnertik aallartittussaavaat. Suliamut tassunga ilagitillugu inunnik ikiorsiisinnaasunik atorfeqartitsinissap pilersinneqarnissaanik kissaatigisaq ilanngunneqassaaq.

Naalakkersuisut taamatut aaqqiissuteqarnissap qanoq inatsisinnngortinneqarnissaa pillugu kommuninik oqaloqateqarnissaq tulluartausoraat. Taamaattumik Naalakkersuisut tulluartausorinngilaat qanorpiat aaqqiissuteqarnissaq siumoortumik inisseriissallugu. Tamatumunnga tunngatillugu Naalakkersuisut aamma pingaartippaat aaqqiissuussineq taama ittoq atuartunut tamanut atuutissasoq, illoqarfinni atuartunut taamaallaat atuunnani. Taamaattumik pingaartuuvoq, soorlumi siunnersuuteqartup tamanna aamma eqqumaffigeqqugaa, inuup isumalluutaasussap piginnaasaqarfissaanik piumasaqaatinut tunngatillugu ammasuunissaq, taamaaliornikkut sulisussat pisariaqartitat pissarsiarineqarsinnaaneri periarfissaqalissamat.

Taamaattumik Naalakkersuisut allannguutissaq una siunnersuutigaat:

**Kommunit atuarfinni ikiorsiissuteqartarfimmik pilersitsinissaannut ingerlatsinissaannullu pisussaaffilerneqarnissaat atuarfik pillugu inatsisip atuuttup allanngortinneqarnissaanut siunnersuusiornissamat Naalakkersuisut peqquneqarnissaannik Inatsisartut aalajangiiffigisassaattut siunnersuut. Ikiorsiissuteqartarfikkut qulakkeerneqassaaq meeqqat tamatuminnga pisariaqartitsisut atuarfimmut tunngassuteqanngitsunik ajornartorsiutigisinnaasaminnik, oqaasertaliisinnaanerminnut qaangiiniarnerminnilu ikiorneqarnissaminnut pitsaanerpaamik periarfissinnissaat.**